

In tschuppel activitads e projects

Il Forum cultural Tujetsch presta bia lavur a favur dalla cultura e la historia

(anr/hh) **Dapi otg onns tgira e promova il Forum cultural Tujetsch la cultura e la historia enteifer la vallada. Era igl onn vegnent preveda el da cuntinuar cun sias activitads. El center da quellas stat la realisaziun d'in archiv cultural. Ina localitad persuenter ei avon maun.** Cun occasiun dalla radunonza generala dil venderdis passau a Sedrun ha la suprastonza dil Forum cultural Tujetsch saviu trer ina bilanza positiva da sias activitads digl onn passau. Ultra dalla cuntinuaziun dallas lavurs da restauraziun dil Casti da Putnengia ha il forum era arranschau ina sera da referat e la notg da film. A quella ein treis contribuziuns dil liug vegnidas mussadas, denter quellas era in film documentar davart la construcziun dil mir da fermada da Curnera. Pigl onn 2006 ha il forum danovamein realisau in calender cun fotografias veglias dil hotelier Lucas *Berther*. *Ils* maletgs ch'embelleschan quel ein aunc mai stai publicai.

200'000 francs per la cultura

Tenor il president *André Schmid* ha il forum investau en ses otg onns d'existenza rodund 200'000.- francs ella promoziun dalla cultura ed ella historia. Biebein la mesadad da quels daners ei flessegiada el project da restauraziun dalla ruina da Putnengia. Las lavurs vid quella vegnan cuntinuadas igl onn vegnent. «Nus quin tein da saver terminar la restauraziun dil baghetg sco tal. Igl onn suadont duein las lavurs dil contuorn allura aunc suandar», di *André Schmid*. Per saver finan ziar la davosa etappa ei il forum danovamein dependents digl agid dalla populaziun, dalla vischnaunca e dil cantun. Cuntinuar vul il forum era cun la lavur vid l'ediziun da pader *Baseli Berther*. *Ils* documents ein rimnai, ussa suonda aunc ina registraziun da tuttas ovras. El decuors digl onn vegnent eis ei previu d'edir l'ovra cumplessiva en fuorma da dus entochen treis toms», declara *André Schmid*.



**Dapi otg onns tgamuna
André Schmid
sco president il
Forum cultural Tujetsch**

In niev archiv cultural

Dapi la fundaziun sefatschenta il forum dalla realisaziun d'in archiv cultural. Ussa para la soluziun per in tal d'esser cattada. Igl archiv duei vegnir endrizzaus denter la halla da gimnastica e la scoletta a Sedrun. La localitad che seprenta il mument aunc ella construcziun criua ei en possess dalla vischnaunca. Ina gruppa da lavur vegn a suttametter allas autoritads communalas in concept persuenter. «Quei archiv füss segiramein ina purschida singulara ed in enrihament cultural per l'entira vallada», di il president. Plinavon vul il forum sustener finanziamein la restauraziun dil pistregn vegl a Zarcuns ed actualisar la purschida culturala e historica sin internet. Quei duei succeder sut il tetg dalla pagina d'internet dalla vischnaunca da Tujetsch. Per la quarta ga preveda il forum era d'arranschar l'auter onn la notg da films. Probablamein vegn la premiera dil film davart las cristallas en Val Tujetsch, che vegn realisau dapresent da *Gieri Venzin*, a star el center da quella. En mira ha il forum fauter onn era la viseta d'in auter forum cultural. Cheutras duei vegnir empustiu contacts e priu investa dalla lavur d'autras organisaziuns da cultura.

Suprastonza vegn reeligida

Sco quei che *André Schmid* di vul il forum realisar ils differents arranschaments e projects cun agid da gruppas da lavur. Cheutras duei la lavur vegnir repartida sin pliras schuialas. La suprastonza dil Forum cultural Tujetsch che consista dapi la fundaziun avon otg onns da *André Schmid* (president),

Tarcisi Hendry (cassier) e *Bruno Berther* (actuar) ei vegnida reelegida il venderdis sera per dus ulteriurs onns. Il forum dumbra il mument rodund 50 commembras e commembers activs. Ultra da quei prestan denter 100 e 150 donaturs onn per onn ina contribuziun finanziaria vid las activitads dall'uniun.